



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tiryimyim@aolima



tir yimyim

TAPAK 3



Taiwan VP-i US
semdangba China-i aitsü

Centre sorkari health system
jenjang shirangdaksür: Kharge



VOL. XX NO. 302 (ADOK 302)

DIMAPUR TENTONÜ (MONDAY)

LUROI (AUGUST) 14, 2023

₹ 5.00

Manipur tensa tajungba kümdar: CM Biren

Imphal, August 13, 2023 (Agencies): Manipur tensa tajungba kümdar aser tesüiba anogo ishika tsüngda ozüing alema inyaksangshiba ajema kümogo ta Deobarnü Chief Minister N Biren Singh-i ashi.

"Manipur tensa atema high-level committee ka tentetogo aser nübertemi ozüing alema inyaksangshiba nungi pilaa alitsü ayongzüker. Asenoki olemtep ajanga dang tebilemstütem koktetsüla" ta pai ashi.

"Mepetmesü adokba ajanga nisung taküm aser kiojen aika samaogo. Iba mepetmesü ajanga asenok kecha majangzüksü anungji ni nübertem dang ozüing alema inyaksangshiba azüoktsü merangba nung amalitepa yaritepsü mepishir" ta Manipur CM-isa metetdaksü.

"Manipur nung senso ajak longjemmer asen lima longjemtsüla aser kümzüka ayutsüla. Asenok longjema alitsü aser lima kümzüka ayutsü atema tezüngzüktep akangshidi"

ta paisa ayongzüker. "Manipur state litsü kümzüka ayutsü atema nisung ajaki amalitep lidaktsünür. Nübertemi yaria ozü sorkari yimjung aser azükaru lidaktsütsü aser kechi südir süaka state litsü kümzüka ayutsü" ta Biren-isa shisem.

"State sorkari August 15 nungi tenzüka pei talidak tokttsür aoertem tasen yangluba prefabricated houses nung lidaktsütsü. Tesem balala nung item ki yangluogo. Maneni kiojen raksatsürtem asoshi ki tasen yanglutsütsü" ta CM Biren-i metetdaksü.

Peace, Restoration, and Rehabilitation Committee of Manipur (PERERECOM)-i sangdong ka agütsüba sülen CM Biren-i iba osang metetdaksüogo.

"Nübo agi tangar memeneper telok kati aibelenaka nübo teimtiba telok ka ama

Meitei nungeri aria bilemstüla aser tatok agütsütsüla" ta PERERECOM president Jyotim Waikhom-i ashi.

Mizoram MP tem pelashishia agizük



Mizoram nungi MP ana Lengpui Airport, Aizawl tonga arudang nisuntemi tena pelashishia agizükdang agiba noksa angur.

Aizawl, August 13, 2023 (Agencies): Mizoram nungi Lok Sabha MP aser Rajya Sabha MP na New Delhi nung Parliament nung dennür Lengpui Airport, Aizawl tonga arudang nisuntemi tena kanga pelashishia agiükogo.

Lok Sabha MPC. Lalrosanga aser Rajya Sabha MP K. Vanlalvena nati Parliament monsoon session nung Manipur nung Zo kintem atema kanga tasü itta jembia liasü. Iba atema nisungtemi tena nem Mizo sobaliba sü tabentsü agüja pelashishia agizük.

Lengpui airport nung Mizo National Front (MNF)-i ayongzüka sentong nung C. Lalrosanga-i "Opposition-i Manipur nung no-confidence motion pusemba nung ni Congress pusemba agi masü saka Zo kin pusemba agi nungit" ta ashi.

BJP-i aniba centre sorkari Parliament nung Manipur tebilemstü mejembitsü merang, ta MP Lalrosanga-isa ashi.

Pai Manipur tebilemstü

jembitsü atema mepishia saka tanga MP tem den külemi maongka magütsü aser no-confidence motion nung o mejembidaksü, ta paisa ashi.

"Chief Minister Zoramthanga-i tuyuba ama monsoon session piyong onoki Manipur tebilemstü atema NDA anema noktakogo" ta MP Vanlalvena-ia ashi.

"Manipur nung lisopurtem ya tangalen nungi arurtem masü saka British nunger yimsüsüba marudang nungi küm noklang ana tema northeast region nung liyonga arur" ta pai metetdaksü.

"Mizoram nung lisopur ka ama onok ya bendangertem mesüra Myanmar nungi arurtem masü. Onok India nunger lir. Onok northeast nung liyonga aruba ya küm noklang aika tejakdang India nüjiso mangudang nungi lir" ta Vanlalvena-isa metetdaksü.

"Manipur nung Zo nunger ni pusemba nungiter. Onoki Manipur tebilemstü atema noktakba ajanga tanga NDA züngsemtemi onok sempar" ta paisa shisem.

AWUMT-i NH 702D realignment atema nenshir

Dimapur, August 13, 2023 (TYO): Nagaland nung maziungtiba highway ji Kohima aser Dimapur sendaktepba NH 26 lir aser iba sülen National Highway 702D lir ta All Ward Union Mokokchung Town (AWUMT)-i metetdaksüogo.

AWUMT-i Deputy Chief Minister & Planning & Transformation and National Highway Minister dangi züluba shidi ka nung "Kohima atema NH 26 kanga tongtipang asüba amaji ilen ya alirtem atema NH 702D yaa kanga tongtipang lir" ta shia lir.

Nagaland sorkari yimjak nung Mariani-Mokokchung Road (NH 702D) realignment asütsü osang sangoktsüba sülen Ao Senden-i sorkar den osang metetpelatepa arur aser iba nung AWUMT-i Ao

Senden den adener.

PWD (National Highways), GoN ajanga NH 702D realignment asütsü atema Options 5 agütsüogo aser iba osang yimjak nung sayua lir. Anungji Ao Senden-i ashiba ama realignment ji Option-4 (Watiyim-Longjemdang-M a n g k o l e m b a - K h a r - Longjongkong) ama inyaktsüla, ta AWUMT-i shidi nung shia lir.

PWD (NH)-i Nagaland sorkar nem survey report agütsüba nung Option-4 ajanga lenmang kilometre 10 agi tatsüba akümer aser iba ajanga Mokokchung district kübok tzükong 6 nungi 4 sendakteper, ta AWUMT-isa ashi.

Mokokchung district kübok tzükong trok nungi mungdangtemi Ao Senden-i

ashiba pusemba nungitba metetdaksüogo. Maneni, temeket aliba district tem nungi Sumi Hoho, Chang Khulie Setshang, United Sangtam Lihum Bumji, Yimkhiung Tribal Council aser Khiamniungan Tribal Council teloktemia Ao Senden-i ashiba pusemba nungiter, kechiyong NH 702D ya Tuensang, Zunheboto, Noklak, Kiphire aser Shamator district tem atema kanga tongtipang lir, ta AWUMT-i Deputy Chief Minister dang shiogo.

Anungji Nagaland sorkari PWD (NH) ajanga renemba Option-4 nung aliba ama NH 702D realignment asütsü mepishir, ta AWUMT tir Limanungsang aser tongti tezülur Jongpongtemjen nati shidi nung shia lir.

KAAC nung poultry syndicate atema tebilemstü abener: DCCI

Dimapur, August 13, 2023 (Agencies): Karbi Anglong Autonomous Council nung secretary taxation office ajanga poultry syndicate ka nem Dimapur anasa Khatkhati nung check gate ka lapoktsüba osang angashia aoksar ta Dimapur Chamber of Commerce and Industry (DCCI)-i ashi.

Iba syndicate yagi license repranger ta shia Nagaland-i an bener aruba garitem anendaktsür.

Iba syndicate maparen anema Poultry Union Dimapur (PUD)-i August 10 nungi Nagaland telungi an bener aruba noktangogo. Osang angazükba agi syndicate ajanga Dimapur-i bener aruba an seret shia Rs 30 meshir.

"PUD-i poultry ban pusemba nungiter. Nagaland sorkar aser Dimapur district administration ajanga iba atema mapa



meinyakba aser public nem osang kecha memetdaksüba atema süngmanger" ta DCCI-i metetdaksüogo.

"Dimapur nung shishilembabaren tsütsü ozüing alema inyaksangshiba magizüker. Tawa Nagaland-i an bener aruba atema Assam nung syndicate system ka tenteta mapa inyakba osang PUD-i sangoktsüba ya taoksatsüka lir" ta DCCI-isa ashi.

Dimapur aser Nagaland nung poultry mesüra tanga shishilembaba nung syndicate system malitsüla. Iba system ajanga shishilembaba nung

tetsükdaksü jenti ajurua aruogo aser iba ajanga local entrepreneurs aser shishilembar tilatem dak kanga kongshir, ta DCC-isa metetdaksü.

Nagaland-i an bener maruba ajanga nübertem dak kongshir saka PUD-i syndicate system anema raraba nung DCCI-i pusemba nungiter, ta parnokisa ashi.

DCCI den Confederation of Nagaland Chamber of Commerce and Industry (CNCCI) züngsemtemia PUD pusemba sayua August 11, 2023 nü interstate check gate semdangogo.

I-Day atema Assam & Manipur nung security akangshir

Guwahati/Imphal, August 13, 2023 (Agencies): United Liberation Front of Asom (ULFA) aser National Socialist Council of Nagaland/ Government of People's Republic of Nagaland (NSCN/GPRN)-i Independence Day mokdangtsü ayongzüka atema Assam nung security akangshio.

Assam police-i area domination aser naka checking inyakba den külemi security akangshio.

Guwahati nung benjung tuluba amongtsü aser iba sentong nung Chief Minister Himanta Biswa Sarma-i linük wako salatsü. Maneni tesem

balala nung minister aser tongti ketdangsurtemi shilem agitsü sentongtem renema lir.

Honibarnü ULFA-(I)-i email ka yokba nung Assam, Nagaland aser Arunachal Pradesh nung alirtemi Independence Day mokdangtsü ayongzüka liasü.

August 15 ayaterm nungi nikongdang 6:00 ako tashi mokdangtsü ayongzüker ta ULFA (I) aser NSCN/GPRN teloktemi metetdakja liasü.

Manipur nunga Independence Day benjungmong tiptema amongtsü atema police aser security forces mapa lemzüksüogo.

Manipur lendenlen

telungpurtem teloktemi tentetba Coordination Committee (CorCom) ajanga Independence Day sentongtem nung madentsü metetdaksüogo.

CorCo-i nübertem dang Mongulbarneep 1:00 ako nungi nikongdang 6:30 ako tashi mokdangtsü metetdaksüogo.

CorCom nung Kangleipak Communist Party, Kanglei Yawol Kanna Lup, Peoples' Revolutionary Party of Kangleipak, Revolutionary Peoples' Front, Peoples' Revolutionary Party of Kangleipak-Progressive, Peoples' Liberation Army aser United National Liberation Front teloktem dena lir.

Kohima nung 29 buba Spero Meliora sentong agi



Kohima, Luroi/August 13 (TYO): Kohima Village Students Union (KVSU) aser Dolphin Club Kohima lungjemer Kohima Village Council Hall, Kohima village nung "Break the Ice and Steal a March" omen kübok 29 buba Spero Meliora 2023 sentong Honibarnü agia liasü.

Iba sentong nung tesemdanger tongti Commissioner and Secretary, Works and Housing, Kesonyü Yhome-i jembidang, asen oshi-oben aser sobaliba, aser asen ayak wazüka ayutsü aser sobaliba tajung asoshi mapa inyaksü ayongzüka liasü.

Oshi aika tesamar aliba ngua temolung shiranger aser asenoki tang yongi mera magira asen senmang tuluka samatsü, ta pai ashi.

Asen oshi-oben, sobaliba aser yimsü-yimbong wazüka ayutsü ya sendaktepa lir. Asen osang ajanga sobaliba aser yimsü-yimbong abener aser aji melira asen takum yimya samatsü. Asen oshi ajanga dang asenoki tarutsü putu nem asen yimsü-yimbong, sobaliba aser otsü angazükdaksür, ta Commissioner & Secretary, Yhome-i ashi.

Asen oshi-oben, sobaliba aser yimsü agizüka asen libaluri yimya tajung kumdaksütsü merangtsüla aser oshi-oben wazüka ayuba aser sobaliba

sentong tem ayongzüka ajanga takok angutsü, ta pai ashi.

Asen tera nung temolung agütsütsü lanurtem ajungshitsüla aser pei oshi-oben aser senmang asoshi nüma tangtetdaksütsüla. Yamaji inyakba ajanga asenoki asen otsüla-oboula nunger sobaliba maneni mesamai benschitetsü, ta pai ashi.

Pai sentong nung adener ajunga dang asen sobaliba tajung wazüka ayutsü aser yimya tajung nung alitsü ayongzüka liasü.

Pa school azüingba mapang iba sentong nung adenba bilemteta jembia liasü.

Yhome-i 'job opportunities' tali adokdaksütsü, entrepreneurship tali ajungmesotsü aser kati ka yaria dangar dak memetaloki alitsü indang jembia liasü.

Mapa kecha tulu mesüra tila ama mezüngshitsüla, aser ajaki tila nungi inyak tenzüksü molunga alitsüla, ta Commissioner-i ashi.

Pai putu menden, lenirtem aser kija shia dang kati ka den yaritepa lungjemer employment aser rongsenketzüng aintsü asoshi inyaksü ajungshia liasü.

Dangar tim atemba angateta item nungi lesson tajung angazüktsü nüngdaker, ta pai ashi.

State nung nisung aika züpa-züba aser sadoksayima alir, aser ibaji ajanga timtem nung alirtem

junga mangateter aser meima mebilemer, ta Yhome-i ashi.

Timtem nung aliba tali tajungba nung angatetsü aser parnok yaritsü asoshi nüburtemi yimdak timtsüng nung alirtem yimya asadangtsüla, ta pai ajungshi.

Paisa pei atema kisüng masü saka lokti ajungtsü asoshi inyaksü kanga tongtipang lir ta ashi.

Pai telungjem aser amalitep akatsü ayongzüka aser ka kuma lungjember ajanga state nung terenlok asoshi inyaktetsü, ta ashi.

Spero Meliora ya Kohima village nung khel pezü - Tsütuoouomia, Pfuchatumia, Dapfhütsumia aser Lhisemia - lungjemer kenshi oshi nung tokteper aser kaketshirtem tasü aittsü, kati ka nungi angazüktsü aser tangatetba tajung alirtem ajurutepe pei angatetba lemsateptsü sapang ka lir.

Iba tetoktepeba nung Dapfhütsumia Students' Union ya overall champion liasü.

Iba sentong moaja Khedi Baptist Church pastor Kethosenuo Kire-i sarasadem aser KVSU tir Vilalhou Sorhie-i pela agizükba o jembia liasü.

Sentong nung Petevilie Keyho aser Mengutseinuo Kire menden liasü aser Organising Committee convenor Kethosituo Mepfhüo-i tayongzüka o jembia liasü.



Linük jaklen August 12 nü "Meri Mati, Mera Desh" anogomung amungba sentong nung GMS Salangtem, Mokochung nung tesayurtemi anir kaketshirtemi shilem balala agiba noksa nung angur. Iba sentong nung parnoki pei lima meimtsü tenangzüka agi aser linük asoshi takum bendanga agütsür tasütait nokinketerem tenla bilemteta shimo milen tsükloker akhüm agüja liasü.

Ag Baptist Arogo Padum Pukhuri Women Ministry

Tsungremi agütsüba sempet agi pei sasa inyaktetba/yanlutetba osettem mesura chiyongtsütem ayokba sentong.

Anogo : 15th August (Tuesday) 2023.
 Mapang : 12:00 Noon - 7:00 Pm.
 Jaka : Tenla Ki Compound.

CNTC Legislators nem tenüngsang agütsütsü

Dimapur, Luroi/August 13 (TYO): Central Nagaland Tribes Council (CNTC) ajanga 14th Nagaland Legislative Assembly nungi CNTC Legislators nem tenüngsang agütsüba sentong ka Chümoukedima nung August 18, 2023 anepdang 11:00 ako

nungi agitsü, ta CNTC sangdong ka ajanga ashi.

Iba sentong nung CNTC legislators, 3 Apex Tribal Heads, CNTC Executive Council Members, CNWA aser CNSA ktdangpur tem medema arua adentsü metetdaksür, ta sangdong ajanga ashi.

CEAN pur 33 buba lokti senden menogo



Kohima, Luroi/August 13 (TYO): Civil Engineers Association of Nagaland (CEAN) pur 33 buba General Conference & Felicitation sentong "Towards truth, justice and excellence" omen kübok Capital Convention Centre, Kohima nung Honibarnü agia liasü.

ajungshia liasü.

Iba sentong nung o jembir Advocate aser social activists Kezokhoto Savi-i civil engineer tem dang pei mapa nung temolung agüja inyaksü aser ki o jen terenlok bener arutsü ayongzüka liasü.

Iba sentong nung SDO PWD Imtisunep, Combined Technical Association of Nagaland (CTAN) convenor Meshenlo Kath aser CEAN president Choice Pielie nungeria o tatsütsü jembia liasü.

Iba sentong nung CEAN ajanga züngsem 58 nem tenüngsang agüja liasü, shirnok NPSC aser NSSB densema competitive exam balala nung takok ngua liasü. Iba shilem ya CEAN vice president Vungao Murry-i ketdangsüa agi.

Engineer temi temelenshi bener arutetsü aser parnok ya ki o jen terenlok tsütsü mapa tajung inyaker ka-ka asütsüla, ta pai ashi.

Sentong nung menden Catherine B. Odyuo liasü aser Youth Pastor, City Church Kohima, Zajamo Odyuo-i sarasademer sentong tenzüka aser CEAN general secretary Dovili Swu-i pela agizükba o jembia liasü.

Engineer temi tongtipang shilem agitsüla aser contractor temi mapa inyakba mittsüla aser kinunger-adianu mesüra tembar nem contract agütsüba yimya indoktsüla, ta pai ayongzüka.

Iba sentong nung Thepfuluetuo Keyho & Kevileho Kin aser Core Member Manweng nunger temi temeja ken tena liasü.

Lenmang aser apu aser ano danga ki o jen tem state asoshi rongsen ka ama amshitsüsa technical tsütsü yimya shidak amshia yanglutsüla, ta pai ashi.

Core Member CEAN Neichütuooung Yhome ajanga sentong nung senotsü osang agütsü, CEAN finance secretary Vekrolu ajanga melepzüng o jembia aser Core Member Sipongchila Chang-i sentong tembanga sarasadem.

Pai engineer akumtsü jangra alirtem dang meranga aser tajungba inyaksü

Centre sorkari health system jenjang shirangdaksür: Kharge



New Delhi, August 13 (Agencies): Amongnü Congress party Tir, Mallikarjun Kharge-i Ato kilonser Narendra Modi aija, pai aniba sorkari linük nung health system shirangdaksür aser AIIMS nung doctor aser staff tem agi meperir, ta metetdaksü.

saakadokogo aser Modi sorkar dang tatembang salem ashitsü mapang tongogo, ta ashi. Media osang nung ajemdaker Kharge-isa AIIMS 19 nungbo doctor tem aser staff tem agi meperiba osang metetdaksü. "Auyaba aser yazü jembiba Kharge-isa, nübürtem

Modi-i jembiba o ajak nungji tiyazü lir. Parnoki AIIMS (All India Institute of Medical Sciences) aika amenokogo ta jembir saka ochiji- AIIMS aika nung doctor tem aser staff tem agi anünger!" ta Congress Tiri X (taoba mapang Twitter) ajanga metetdaksü.

"Modi, Coronavirus wara mapang nendaka meinyakba nungi tenzüka Ayushman Bharat nung ochimashi inyakogo. Ner sorkari linük health system shirangdaksür. Nübürtem saakadokogo. Nai ashioktsüba metetogo aser ner sorkar dang tatem salem ashitsü mapang tongogo," ta Mallikarjun Kharge-isa metetdaksü.

I-Day tongti sentong nung adentsü atema nisung 1,800 jaoker

New Delhi, Luroi/August 13 (Agencies):

Taküm Independence Day anogomong tongti sentong nung adentsü atema Centre sorkari nisung 1,800 jaokogo; tejaokertem rongnung yimtsüngtem nungi sarpanches, tesayurtem, nurse tem, aluyimertem, angopurtem aser aayangertem densema lir.

Küm shia Independence Day tongti sentong ya Red Fort nung agir, kong Ato kilonseri linük wako asongtsü aser linük nübürtem den jembitsü.

Taküm I-Day nung tongti tesemdangjerji Egypt Tir, Abdel Fattah el-Sisi asütsü. Pai January 24-26 anogotem nung India semdangtsü.

Iba sentong nung adentsü atema tejaoker 1,800 rongnung linük terenlok atema lenla balala nung tongtibang shilem agirtem aika densema lir.

Tejaokertem rongnung 'Vibrant Villages' nungi sarpanches, tesayurtem, nurse tem, aluyimertem, angopurtem aser New Delhi nung Central Vista Project mapa inyaker aayangertem, Khadi sector nung inyakertem, national awards angur tesayurtem, Border Roads Organisation nung inyakertem, 'Amrit Sarovar' aser 'Har Ghar Jal Yojana' projects nung inyakertem densema lir.

Iba sentong nung adentsü

atema Pradhan Mantri Kisan Samman Nidhi Scheme (PM-KISAN) ajanga tajangzük angur kibong 50 jaokogo.

Pune District nungi aluyimer, Ashok Sudam Ghule-i, "Ni New Delhi nung Red Fort semdangtsü atema maongka angutsü, ta kodanga mebilemi liasü. Independence Day anogomong nung iba tesem semdangtsüji mangdang ka atalokba amai asütsü," ta ashi.

Ashok Sudam Ghule ya PM-KISAN scheme nungi tajangzük angur ka lir aser pai ali acre 1.5 nung mochi-lu tuluka yimzüka lir.

Iba sentong nung adentsü atema Haryana nungia nurse asem jaokogo, iba dak alia state balala nungi nurse ajak senteper 50 shi jaokogo.

Faridabad nung aliba Badshah Khan Civil Hospital nung Blood Bank nung Nursing Officer, Savita Rani-i, iba sentong nung adentsü atema jaokba ya maongka tulu, iba osang angashia lar kibong aser and hospital staff tem ajak pelar, ta metetdaksü.

Osang angazükba agi, coronavirus wara mapang nung Savita Rani-i tangar dang nungi alakteta shilem tajung agia liasü. Taküm May 12 nü Nursing Day anogomong nunga linük Tir, Droupadi Murmu-i la nem tetushi agüja liasü.



August 13, 2023 nü Gandhi Maidan, Patna nung Bihar Police-i 77buba Independence Day parade atema renemshidang tangokba noksa nung angur.

PROGRAMME FOR CELEBRATION OF 77th INDEPENDENCE DAY 15th AUGUST 2023

AT NAGALAND CIVIL SECRETARIAT PLAZA, KOHIMA

0600 hrs : Hoisting of National Flag in all Government Offices, Institutions / Public & Private Buildings.

0850 hrs : Review of Parade by DGP, Nagaland.

0900 hrs :

- Hon'ble Chief Minister arrives, hoists the National Flag, takes Rashtriya Salute and inspects the Parade.
- Address by Hon'ble Chief Minister.

ADMINISTRATION OF PLEDGE FOR DRUG - FREE NAGALAND BY HON'BLE CHIEF MINISTER

- Presentation of Awards.
- March Past.

PARADE CONTINGENTS :

1. 78 Bn. CRPF	12. 1 Naga Girls Bn. NCC
2. 37 Bn. BSF	13. Bharat Scouts & Guides
3. DEF, Kohima	14. Rüzühkhrie GHSS
4. 5 th (IR) Bn. Arunachal Pradesh Police	15. GHS, New Market
5. 4 th NAP Bn.	16. Mewi Hr. Secondary School
6. 10 th NAP (IR) Bn.	17. Coraggio High School
7. 15 th NAP (IR) Mahila Bn.	18. Nagaland Police Central Brass Band, PTS
8. Home Guards & Civil Defence & SDRF	19. Nagaland Police Auxiliary Brass Band
9. Ex-Servicemen	20. 15 th NAP(IR) Mahila Pipe Band
10. 24 Nagaland(I) Company NCC	21. 1 Assam Rifles Pipe Band
11. 1 Air Squadron NCC	

Parade Commander : Shri Vikato Thonger
Dy. Commandant, 4th NAP Bn.

Second-in-Command : Kumari Ngimchule Nampeung, NPS
Asstt. CP, (CP Dimapur)

LAUNCH OF eOFFICE AND eVIGILANCE APPLICATIONS BY HON'BLE CHIEF MINISTER

Cultural Presentation / Entertainment

1. SONG AND DANCE PERFORMANCES :

- "Patriot" (Women Resource Development Deptt.)
- "Maa Tujhe Salam" (Women Resource Development Deptt.)
- "HOPE: Live the Promise" (Nagaland Adolescent Girls Club)
- "Mhesho Mheghi Kivi" (Nagaland Chamber Choir)
- "Courage Lives" (TaFMA)

CULTURAL PRESENTATION :

- BURGEON Society Chedema, (Angami Tribe)
- Aong Riju Cultural Organization, (Ao Tribe)
- Dzulhami Cultural Troupe Kohima, (Chakhesang Tribe)
- Garo Cultural Troupe, Dimapur, (Garo Tribe)
- Khiamniungan Cultural Troupe, Kohima, (Khiamniungan Tribe)
- Tobu Area Sheko Khong, (Konyak Tribe)
- Pochury Cultural Troupe Kohima, (Pochury Tribe)
- Shena Old Union Kohima, (Sumi Tribe)

1200hrs : Governor's "At Home" - By invitation

VISIT OF INSTITUTIONS BY CHARITABLE ORGANIZATIONS (1200 hrs onwards)

- State Mental Health Institute : Gorkha Public Panchayat Kohima
- District TB & Chest Diseases Hospital, : Indian Red Cross (Nagaland State Branch) Khuzama
- Leprosy Colony, Nagabazar : Kerala Club
- Tabitha Enabling Academy : Royal Club
- Old Age Home : Kohima Press Club
- Kohima Orphanage & Destitute Home: Kohima Chamber of Commerce & Industries
- District Jail : Nagaland Adventure Club
- Bright Morning Star Orphanage, : Nagaland Contractors & Suppliers Union Paramedical
- Cherry Blossom : Kohima Masjid Committee
- Jo Foundation : Angami Students Union
- Cradle Ridge : Classic Club

Distribution of sweets at the parade ground by Dobashis of DC Office, Kohima

EVENING PROGRAMME AT SECRETARIAT PLAZA

1500 hrs : Exhibition Football Match
Morning Premier League II (MP2 - II) Vs. IGS Academy (Girls Team)

1600 hrs : Prize Distribution.

1630 hrs : Band Display

- Nagaland Police PTS Brass Band
- 1 Assam Rifles Pipe Band
- 15th NAP(IR) Mahila Pipe Band
- Nagaland Police Auxiliary Brass Band

Beating of Retreat



TIR YIMYIM YIMOBILEM (EDITORIAL)

DIMAPUR TENTONÜ, LUROI(AUGUST) 14, 2023

Tanü Naga Nüchisomung

Tanü ya India nungerasünungbo 'Purna Swaraj' anogo süla, kechiyong India nungertema British yimtentalenba nungi mesalatsüaka 1930 küm January 26 nü Jawaharla Nehru leniba nung IndianNational Congress teloki India yimten nüchiso, Purna Swaraj, nguogo ta yimjaknung sangdonger nüchiso anguba anogo amongtsü tenzük. Purna Swaraj tetezü Hindiagi " Ajak nung Nüchiso" ta angatetsüa akok. Iba nüchiso anguba telemtetba ya1929 küm December 19 nü Indian National Congress senden Lahore nung alidanglemtet aser iba telemtetba ya yimjak nung mesangdongdang tamasa 1929 kümDecember 31 nü INC tir Jawaharlal Nehru-i Lahore nungsa Ravi ayongküm nung mezüng India wako atsüket.Atangji, 1930 küm January 26 nü India nüchiso sangdongba ya odangbo sangdongbamasü. Iba mapang tashi nungbo, talisa, 1919 küm Jallianwala Bagh nung Britishnungertemi taochi maka India nungertem khasetba nungi tenzuka India nungertaküm aika samar liasü. Aji oda, Mahatma Gandhi-i anir British yimten den Indianungertemi maparen kecha nunga amalitep malitsü ta sangdongba sentong nungatesem aika nung lendong atalok aser Mahatma Gandhi-a tepuokdak ayutsüsa aküm. Itemtimtem tekangshi ajak tizükteta Indian National Congress lenirtemi 1930 kümJanuary 26 nü India nüchiso nguogo ta parnoksa sangdongba sülen küm 17 bubanungang 1947 küm August 15 nü shitakba India asoshi yimten nüchisobo angu.Atangji, India asoshi tesasatsüka mezüng India nüchiso wako atsüketdak aser1930 küm mezüng India nüchiso nguogo ta sangdongdak tesem Lahore yimtiboshitakba nüchiso anguba India yimten küboki maittet. Aji oda, alima nung kinshia pei yimten nüchiso atema raraba nung tejashi aser tepela dang masü sakatenüngsang aser tesasatsü aika lir. Indiyimten nüchiso bushiba mapang tatalokbatemji kodang asenok Naga nung yimtennüchiso bushiba mapa aser mapang den medemdangdir kanga mesüktepa lir. Indianungertemi bendanger yimten kübok melinüba ama Naga nungertemia melinü. Indianunger asoshi yimten nung bendangerji British nung liasü saka Naga nungerasoshibo British aser India nung na pronglaji bendanger liasü. Iba jagiang,Naga nungertemi British nungertem dang parnoki India toktsüba mapang Naganungertembo India kübok masü Naga nungertema Naga nungersasa yimten latetaaotsüsa tokjang ta Naga Club teloki Simon Commission nem 1929 küm tezüluba nungagütsüba angur. Naga Club-i Simon Commission nem 1929 küm Naga yimten temetenatema tezüluba agütsüba sülen, India nung Congress teloki lenisüba agütsübaamato masü, saka 1946 küm Naga National Council kümteta Naga yimten temetenindang shia arua mejembi tashi 1929 küm nungi 1945 küm tashi Naga Club-i Nagayimten nüchiso asoshi lenisüba agütsüba mangur. Ajisüaka, NNC kümtetterkülenang Naga nungertemia 1947 küm August 14 nü Naga yimten nüchiso nguogo tasangdongba anogomung tanü tashi amunger. Atangji, India nungertema 1930 küm nungi1947 küm tashibo January 26 ya India yimten nüchiso anguba anogo ama mungaliasü. Aji oda, parnokbo pei taso lima meimba tashitemeteter lenir aikati anirnübertem nem tangatetba tajung agüja yimten nüchiso asoshi rarayong tesüsaboyimten nüchiso angu. India yimten nüchio atema raratsü atema Gandhi-ibocoat-suit, necktie aser tsüngsem dena semdoka endok aser itemji kodanga shiamaru. Kasaji, India nungertemi Purna Swaraj sangdongba sülen British yimtennungi taa agia inyaka alirtem ajak anen aser British nung oset aser süoshimagitsü mulungtet. Aji oda, India nüchiso atema raraba otsü nung lenirtemirongsen bushiba aser nübertem dang nungi tashiyim agi saru saruba otsümangashi. Iba denji kodang tanü asenok Naga yimten nüchiso bushibaren indangmedemdangdir, asenokbo India government ita sen chia Naga nüchiso indang jembiraser Naga yimten nüchiso dang nungi rongsenang temeimba akümba angur. Iba tianung tanüa Naga yimten nüchiso bushir telok zünger mezüngma nungi ato kilonsertemiNaga yimten nüchiso onük jembiba " Naga Independence Day speech" angashitsü. Ajikoba agitsü ? Iba jagi tanü tashi Naga yimten nüchiso ya pongmang ama ka dangkümdaktsüogo. Ajisüaka, kodaser Naga zü adenba senso kati 1947 küm August 14 nüNaga yimten nüchiso sangdongba amadoktsü ? Aji amadokerbo pei temeten metetba nüchi pur masü, saka peitetsü taso lima ashioktsür tamachi pur asütsü !

OLEMSABANG

AZÜ (BLOOD) MERUK-MERUKA ASÜNGTETA AYUTSÜLA

~ L. Kika Pongener.

Asenok mimchirtem alima nung taküm aliba ya küm kwika arishia ali (?)...ta asüba dang nungibo kechi koda aser koma ali (?)...ta asübaji kanga agi tongtipangba lir. Asenok alima nung taküm tatsüka alidang alima aser nubur asoshi tajangzük mapa langkabosa inyak asü (?) Mesura asen kija ajangzüksüba dang inyaka aser bushia lia aru (?)...ta asenok ajaki khen arokaroka shisadangdi aser asüngdangdi. Aji oda, asenok alima nung taküm tatsüka alidang, tangari nguaka, monguaka, metetaka aser memetetaka, aseni inyakba mapaji tajung aser ochishia inyakra, iba tasüngtet azü (Blood) senmangji asen chirnur aser semchi-semnur tashi amangtepyonga aotsü. Asenoki asen azü (Blood) ya asüngteta meruka ayutsü kanga dang tongtipanga ta angatetdi. Nisung aikati pei azü asüngteta meruka meyutetba agi, pa/la-bo kenshi-oshir, tashitemeteter asüba sernung, par chirnur semchi-semnur kata pa/la amai kenshi-oshir, tashitemeteter mesotetba/madokba nisung aika angutsü. Shidakba agibo pa/la dang nungi par chirnurji tashitemetetba asütsüla aser ano par semchi-semnurji kanga agia tashi-temetetba asütsüla. Ano pa/la aso-ajen sorobangro dang nungi par chirnurji tera tajungba asütsüla, aser ano par semchi-semnur aso-ajen aser sorobangroji kanga agi tajungtiba asütsüla. Tsüngrem o-i ashir, "Nisung tajungi pei semchi-semnur nem senmangtsü toktsür" (A.Shin-13:22). Aji oda, mezüng Generation dang nungi tanabuba Generation tera tajungba asütsüla aser tasembuba Generation-jibo kanga agia tajungtiba asütsüla. Ajisuaka, kanga tesasatsüka, nisung aika pa/la-bo kenshi oshir, tashitemeteter asüba sernung, par chirnur aser semchi-semnurbo tebang nung temeli masem, matu-malem, temeli tatsük, sowa-solem sotetba-a tia maka karbo lir. Aji oda, tetla-tetshirba masü, saka tangar asoshi tansutsü, tekümdangtsü aser tatishtisü asütsüba indang jembir. Asenoki item ajakji kanga junga shisadagra, par tetsü-tebou nungeri, ashiko, shia meteter ta ser keno tali-tapong jembia alitsü akok, tangar kar tashi-i arioka yutsüa alitsü akok, kar tali-tapong ajemoka yutsüa alitsü akok, kar talak mesuker yutsüa alitsü akok. Ibajagi alima nung ya jembiteter ta ser ken o-a tali-tapong mejembir, tanü asen jenjang tera junga lir ta ser tali-taponga meinyaker. Kechi ken o jembidir jembika asüng-yanu aser tarutsü indang shisadanga chinung-anunga dang jembir aser kechi inyakdir inyak-aka asüng-yanu aser tarutsü anogotem indang shisadanga chinung-anunga yua dang inyaker. Otsüla oboula nungeri shin o jembia aruba... Ena "Par tetsü-tebou nungeri aser par tsüraburi ajak jembima-a/jembidema jembiba agi, aser par tetsü-tebou nungeri aser par tsüraburi ajak inyakmaa-adokba agi, par chirnur aser semchi-semnur tejembitsü aser teinyaktsü maka aja" ...ta jembia aru aser aji kanga shidak lir. Tanü asen tera kaa-ita lir ta ser, mesura shia-meteta lir ta ser tali-tapong mejembir aser meinyaker. Tsüngrem o-i ashir, "Asüng indang ne sasa mezümeküm tesu, kechiyong anogo-i kechi bener arutsü nai memetet" (A.Shin-27:1). "Kechiyong asüngji kechi adoktsü'ar nenoki meshitet. Nenok taküm kechi (?) Kechiyong kenpiga angur aser sama-a aoba tangola aji nenoklir" (Yakob-4:14).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nagaland nung Catholic Khristantemi UCC anema nokdaker

Kohima, Luroi/August 13 (TYO): Honibarnü Catholic Association of Nagaland (CAN)-i linük nung Uniform Civil Code (UCC) anema, India telongjem tashiji kangshia kasa ozüing benokba ajanga masü saka ajak tesünep nung aliba dak keta lir, ta metetdaksü.

Kohima nung anogo piyong "Reading the signs of the times" onük nung seminar agia o lemtepbä sülen osangbenertem den jembidang Kohima Diocese nung Bishop, Rev. James Thoppil-i, UCC ajanga nüburtem nija taküm, kin aser tamangba yimsü nung jangjonger, ta ashi.

"Meimchirtem temeden balala akhümtsübutsä. Sobaliba balala ajungkettsütsüla aser ajungshitsüla. Linük ka telongjemji nübur ajak tesünep nung litetba dak keta lir," ta paisa ashi.

Linük tashiji oshi aser yimsü balala amangertem külemi tesünep nung litetba dak dang keta lir, aser ibaji

ajungkettsütsüla; UCC nem atema-a jembio, ta metetdaksü.

CAN advisor Jonas Yanthan-i seminar nung Arla 371(A) benoka liasü aser pai, nüburtem ratamataba onüktem jangjashitsü atema iba onük nung o lemteptsüsa aküm, ta metetdaksü.

UCC dak sendakba nung Nagaland nung Catholic Khristantem tangatetba metetdaksüdang CAN Tir, Johnny Ruangmei-i, "UCC ya 'bendanger'. Linük tesem balala nung kin balala aser tamangba yimsü balala amangertem ajak külemi alir, anungji ozüing ka ajanga asenok yimsü südaksütsü makok," ta ashi.

"Telongjem aser 'uniform' naji khenyongi balala. Linük nung yimsü aser sobaliba balala benshirtem longjema alitsüla saka iba telongjemji raksatsütsü atema 'uniformity' ji mebenoktsüla," ta paisa metetdaksü.

Ruangmei-i, anogo piyong seminar UCC atema jembiba dak alia Arogotemisa state sorkar mapatong balala-Registration of Indigenous Inhabitants of Nagaland (RIIN), Naga yimtenren tebilemtsü onük aser India Temzüng kübok Artla 371(A)

Advisor aser taoba mapang CAN Tir, Elias T. Lotha-i Manipur tensa aser RIIN onük benokba dak sendakba nung pai, seminar nungsa tang Manipur tensa atema tebilemtsü akaba lemsatöp aser state nung yimjung atema Centre sorkari inyaksü nüngdak ta bangjemogo, ta metetdaksü.

Ruangmei-isa, taküm October 28-29 anogotem nung "For Christ and His Church" omen nung ajemdakler Kohima Diocese-i küm 50 ajungba Golden Jubilee amongtsü, ta metetdaksü.

1950s nungi Nagaland nung Catholic tamangertem liasü saka 1973 küm nung ang Kohima nung Arogo tenzüka liasü, ta paisa shisem.

Tanzania nunger missionary ana puer ao

August 13, 2023: August 3, 2023 anepdang Khristan putir, Paul Sanogo aser seminarian, Melkiori Dominick na Tenla kidang lia Nigeria nunger telok kati puer aoba sülen tena chiochtsü atema parnoki dollar sen 70,000 akhanger, ta International Christian Concern (ICC)-i metetdaksü.

Tanzania nunger anaji Minna Dioces kübok St. Luke Catholic Church-Gvenda nungi missionary tem lir.

Minna nung aliba Arogo nung tongti putir, Rev. Martin

Igwemezie Ozoukwu-i Affairs den-a iba osangji lemsatöpogo," ta metetdaksü.

Bana-isa, tena chiochtsü atema parnoki dollar sen 70,000 akhanger saka onoki senji ajemdaksütsü atema jembidar, ta metetdaksü.

Missionary anaji chiochtsü atema Tanzania ambassador to Nigeria, Dr. Benson Bana-i inyakdar.

Bana-i, "Arogo lenir ana puer aoba osang angazükba sülen Embassy-i Tanzania sorkar nem iba osangji metetdaksüogo. Onoki Nigeria nung aliba Ministry of Foreign



Tang tesüsa Russia nungeri missile agi amakdang Ukraine kübok Zaporizhzhia yimti nung aliba Orthodox Tenla ki ka poksatsür aliba noksa nung angur. Iba tatalokba nung nisung asem asü aser ita 11 kinü tanur ka densema nisung 9 yiruogo.

ANOGO ABEN TSÜNGREM DEN

Ammang Nung Tesangwa ka T.Ken 119:105-112

Nai iba tekong metetta alitsü akok saka ibai nai mezüngbuba angashir ama tashi agi zügang. "Ne O kü tsüing asoshi milen, aser kü lemang asoshi tesangwa lir" (t.105). Iba tekong nungi kechi lesson nai angazüker?

Alimaji tammang. Iba nung jakla aser tangazükba shisatsü tammang teti alir. Tanü asenoki kaket shisatsü tali angur aser shisatsü (wisdom) ajema angazüker. Nüburtemi tamashi telemtetba agir. Alimaji tanelaren a tammang lir. Satani nübur shisatsü ramia kümdaksür. Parnoki Yisu Khrista nung Tsüingrem sentsüwangshiji mereprangner.

Lemangji tejangja lir. Iba amman lima nung asenoki lemangji koda sangwa küdaksütet? Tsüingremi ajak asoshi lenmangji sangwa yangluja kar aser koloni anitsü asenok shisabulutsü mali. Ibai taküm, temeshi aser temoatsü lenmang lir.

Asenok jajabaji tejangja. Asenoki mera shia nung Tsüingremi asenok asoshi inyakba tejangjaba ngua aor. Ken ken asenoki lemangji talangi oa angutsüsa tesangwaji aginer. Saka Tsüingremi ashir, "Nai tamang agi jajatsü angazükang. Nai taremsük agi jajatsü angazüktsü, kü tenangzükba ajanga."

O ji temulung lemtsü o. O tesangwaji maseper aser iba yagi na memezüdaksütsü. Kodang nai Laishibaji züngdir aser iba ochi jagi ne lemang sangwadaksüdir, nai kechi inyakdaksüner, Tsüingremi ne dang sayutsü.

Nai tamang agi jajara, nai mapang ka nung mera ka dang jilia angutsü akok. Tasü itang, lemangji tejangja aser Tsüingrem O ji temulung lemtsü O lir. Tanü na iba amman lima nung jajadang ibai na asoshi tesangwa südakjang.

Eritrea nunger Khristan 13 tepuokdak nungi chiokogo: VOM

Bartlesville (Okla), August 13 (Agencies): Taoba ita tatemanglen Eritrea nunger Khristan 13 tepuokdak nungi chiokogo, ta Voice of the Martyrs (VOM)-i metetdaksü.

Khristantemji tetsür tenet aser tebur trok lir; parnok nem tiyazü nung tai tonglokja tesüiba küm 10 tashi tepuokdak puoka liasü.

July 22, 2023 nü VOM-i email ajanga Khristantem dang Eritrea nung Arogo lenir ana Pastor Haile Nayzgi aser Dr. Kiflu Gebremeskel na chiochtsü atema sarasademjang ta ayongzüka liasü. Khristan lenir anaji jail nung puokba sülen anogo 7,000 ajungba anogo (July 22) nung parnoki Khristantem dang sarasademtsü mepishia liasü.

VOM-isa Khristantem dang email mesüra fax ajanga Eritrean Embassy dang tepuokdak alir Khristantem ajak chiochtsü atema mepishitsü ayongzük.

Iba sülen Khristan 10,000 dak temai Eritrea nung jail nung aliba Khristantem atema parnoki sarasademtsütsü ta nngzüka liasü. Iba sülen anogo trok dang lirbo Eritrea nung ketdangsertemi Khristan 13 jail nungi chiokba osang angazük.

Ajisüaka Khristan 13 rongnungji Pastor Haile Nayzgi aser Dr. Kiflu Gebremeskel nabo maden.

VOM otongdar, Todd

Nettleton-i, "Eritrea nung asen aianu aser adianutem chiockba atema onoki Kibuba nem tenüngsang agütsür. Khristan 13 tenüing nung onoki Tsüingrem nem tenüngsang agütsür," ta metetdaksü.

Tamalen (2004 küm) Nettleton-i Eritrea nung tepuokdak alir Khristantem ajurua liasü.

Nettleton-isa, "Maneni sarasademjang. Eritrea nung aliba jail balala nung ano Khristan 300 dak tema puoka lir. Parnok atema sarasademtsütsü atema tenüing zülüokang aser ner medemer ka den-a lemsatöpang. Iba osangji ner Arogo den lemsatöpang. Pastor Haile aser Dr. Kiflu na densema tepuokdak alirtem chiochtsü atema sarasademtsütsü asoshi nai tangar-a ayongsemang," ta metetdaksü.

Voice of the Martyrs' 2023 Global Prayer Guide ajanga ashiba agi, linük nung Khristantem reshikangshiba ajanga Eritrea linük ya "restricted nation" list nung densema lir.

2002 küm sorkari Orthodox, Catholic aser Lutheran denominations dak alaka tanga denominations ajak dang Tenla ki shibangtsü tuyua liasü.

1997 küm nungi tenzüka VOM-i alima tesem balala nung Khristantem reshikangshiba mita repranger.

Hawaii morokmi nung asür nisung 93 jungogo



Lahaina, Hawaii nung kitsük-kirong lendong ajanga ki o jen kanga sashia raksatsür alidak search-and-rescue team züngsem ka nisung tasümang bushia jaja aoba noksa nung angur.

Lahaina, Luroi/August 13 (Agencies): Maui ta nüngja agütsür aliba morok mi ajanga otsü balala aliba Lahaina jila arongba lendong nung nisung 93 asüba jangjaogo, koba US morokmi otsü nung tamajungtiba alitsü.

Asürtem timba akumtsü akok, ta Hawaii Governor Josh Green-i Honibarnü ashi aser forensic team temi asürtem maneni asürtem jangjatsü inyaker. Nisung noklang aika kong aliar mejangja aser ano noklang aika morok mi nungi jena oa Maui tesem balala nung lir.

"Ibai tamakoktsü anogo lir. Hawaii nung iba morokmi ya alimar lendong tamajungtiba alitsü," ta pai ashi.

"Takum alirtem yaria atatsüba dang. Tang asoshi akokba mapang nüburtem lungjemdaksütsü aser parnok nem talitsü ki aser health care agütsütsü aser meilongi

yanglushitsütsüba dang lir." Morokmi ya timba azüoktetogo aser Lahaina densema asetkong tesem balala nung mi ajunga okshia remseptsü meranger.

Jana telung nung nisung tasümang aliba azü anir bushia jajar aser tang asetkong tzükumlen aliba tesemtem ketdangsür temi mita aor.

Tang tashi search area shilem asem dang awajemogo, ta Maui Police Chief John Pelletier-i temolung shiranga ashi.

"Parnok jangjatetsü asoshi arsanga DNA tendangtsüla. Tang tashi shingaija iba teraksa ya mejangka," ta pai ashi.

"Tang asoshi tongtipangtiba teinyaktsüji takum jembua alirtem kumzüka ayutsü ya lir. Nisung 1,000 jungnüa den osang magitepteter, karbo kumzüka alitsü akok saka kuli aika mechi osang magitepteter," ta Federal

Emergency Management Agency (FEMA) nung ketdangsür Jeremy Greenberg-i ashi.

Honibarnü Maui indang War Memorial Complex nung nisung noklang aika maneni adenshia chiyongtsü, toiletries aser mozü meshir aser nisung tali arur.

Iba morok mi tenzüker tang tashinung ki o jen 2,000 dak tema raksaogo mesüra samaogo ta amanger. Item ki o jen ya timba Lahaina area nung lir.

Lahaina-i aoba lenmang tuluba, Honoapiilani highway mapang tatsüka asoshi tanaben lapok aser ano shibang.

Ano Kahekili Highway yabo lapoka lir, saka iba lenmang ya ajanga aotsü lendong tulu lir ta ashir.

Maui tanaben yanglushitsü asoshi sen billion \$5.5 (£4.3bn) nüngdaksü, ta Pacific Disaster Center (PDC) aser FEMA ajanga ashir.

Taiwan VP-i US semdangba China-i aitsü

Beijing, Luroi/August 13 (Agencies): Taiwan Vice President William Lai-i United States semdangba sülen China-i parnok indang sovereignty kumzüka ayutsü atema tashiyim agi jenjang tapet agitsü ta tenangzüka agütsüogo.

Paraguay-i aoba mapang Lai khen atema New York nung anenzükba sülen China-i Deobarnü iba olen lemsatapa liasü.

Lai, shiba Taiwan indang taruba tir akümtsü atema imlar rongnung ka lir, pa Paraguay-i tir Santiago Pena mapa agizükba sentong nung adentsü atema oa liasü aser pa ano taruba hopta Taipei-i meyipa aoba mapang US yimti San Francisco nung anenzüktsü sentong yanglua lir.

China-i Taiwan ya parnok meyong ta shia arudar aser Lai-i US semdangba ya aiben aitsüogo.

Lai New York nung anenba sülen mapang tatsüka lir China indang foreign ministry-i sangdong ka ajanga "Taiwan independence separatists" temi US semdangba ya parnoki khenyongi magizüker ta metetdaksü.

"Lai ya Taiwan nüjiso atema nokdaker ka lir aser pa ya mepetmesü adokdaksür ka lir," ta ministry-i ashi.

Taiwan ya China indang ken o teyongtsütiba ka lir aser Taiwan Strait nung mangatetep adokba ya Taiwan-i linük nüjiso atema United States dak metaloktsü merangba ajanga lir ta mapangshia sayuogo, ta ministry-isa metetdaksü.

"China-i tatalokbatem kanga junga meita atadar aser national sovereignty aser territorial integrity kumzüka ayutsü atema jenjang tapet agitsü," ta kasa sangdong ajanga metetdaksü.

Taiwan Tir Tsai Ing-wen dang nungibo Taiwan nüjiso indang Lai-i timba jembia arudar. Tsai atema Beijing ya tsükchir ka lir, kechiyong lai Taiwan ya China nung shilem ka ta asüba magizüker.

Harvard nung azüngba doctor shiba yimden yimsüsür ka kümer lir pai taoba mapang pa ya Taiwan nüjiso atema

inyaker ka ta shiogo aser iba hopta-a local television channel ka den jembiba mapang Taiwan ya People's Republic of China (PRC) nung shilem ka masü ta shiogo.

Deobarnü New York atongba sülen Lai-i social media platform X ajanga ashiba agi, pa Big Apple, icon of liberty, democracy aser maongkatem aliba tesem atongba atema pelar ta ashi.

Paisa, pa airport nung American Institute in Taiwan züngsemtemi agizüka liasü. Paisa, New York nung medemertem den ajuruteptsü aser transit sentong nung shilem agitsü atema yongya atar ta ashi.

Ken o jangja aliba nisung kati Reuters news agency ashiba agi, Lai New York nung anenzükba mapang bendangle aliba Taiwan nungertem den ajurutepe sentong ka agitsü kong pai o jembitsü.

Pai, US legislator tem ajurutsü ta nisungba yagisa ashiba den Lai-i US ajemajema dang semdangtsü, kechiyong tang tensa mejungi lir, ta shisem.

Taiwan nunger ketdangsürtemi ashiba agi, China-i iba hopta Taiwan anasa military drills ayongzüka agitsü akok. Lai-i US semdangba atemer taruba küm election agitsü lia voter tem amokmerentsü aser parnok nem rara tsübudaktsütsü atema military drills ayongzüka agitsü akok.

Deobarnü China indang People's Liberation Army Eastern Theatre Command-i parnok indang WeChat account nung fighter jets tem training agiba indang video ka lemsatepogo aser ashiba agi, parnok sepaitem tawa flight training tesashi ka agiogo.

Beijing aser Washington na tesendaktep yanglushitsü merangba mapang ka nung tang Lai-i US semdangogo.

Tesendaktep yanglushitsü merangba nung Chinese Foreign Minister Wang Yi-i Washington DC semdangtsüba densema lir aser iba ajanga US tir Joe Biden aser China Tir Xi Jinping na ajuruteptsü asoshi lenmang lapoktsütsü akok.

Pakistan: Chinese engineer tem indang convoy ka amak

Gwadar, Luroi/August 13 (Agencies): Tejangja Baloch telungpur telok kati southwest Pakistan nung Beijing-i senotsü teyari agüja yangluba Gwadar Port leni Chinese engineer tem Deobarnü aodang amak. Pakistan security forces temi Balochistan kübok Gwadar nung kiralongrarterem den khatepba mapang kiralongrar ka tepset, ta mitkar osang ka ajanga ashi.

"BLA Majeed Brigade ajanga tanü Gwadar nung Chinese engineers convoy ka amak. Tang tashi rara manener," ta Balochistan Liberation Army (BLA) ajanga sangdong ka nung ashi. China nunger engineer tem mena aliba gari tem nung amakba ya security nungi jangjatsüogo saka ketdangsür nungi sangdong kecha agüja mali.

Pakistan nung kiralongra mapa tali akumer, talisa taoba küm November ita TTP indang ceasefire tembangba sülen Khyber Pakhtunkhwa aser Balochistan province tem nung

lendong tali agütsür. Pakistan Institute for Conflict and Security Studies ajanga kiralongrar temi lendong tali agütsüba indang ashi aser küm tesadang nung nisung 389 takum agiogo ta ashir.

Taoba mapang Baloch separatism asoshi nokdakba telok balalai China-Pakistan Economic Corridor (CPEC) dak sendakba project tem nung tenük yoker amakba tenüng agia liasü. Item lendong mechi security forces tali yoka lir.

Baloch separatist telok temi teti tongpang nung akokba indang o tali raloka jembir, saka Pakistan indang military public relations division ajanga iba ama atalokba osang menur sangdonger.

Taoba küm April ita China nunger tazüng-tashir asem den parnok indang Pakistan nunger driver ka University of Karachi nung aliba Confucius Institute tonga arudang tetsür suicide bomber kati bena aliba tapoktsü oset pokdakja par pezü takum sama. Iba lendong

agütsüba tenüng ya BLA ajanga agia liasü.

Ano küm ka tejakdang Quetta nung Chinese ambassador aliba hotel tuluka Pakistan Taliban temi amakdang nisung pongu asü. 2021 küm Dasu tzünokdang leni mapa inyakterem bus ka nung anir aodang iba bus ya poksaja China nunger mapa inyaker nisung toku densema nisung ter dak tema asü.



Chile indang taoba tir Salvador Allende, tepseter aser samar nem akum agüja Santiago nung jara nung mural yanglushiba ajanga nisung ka aoba noksa nung angur. Chile nung mitkar temi tashiyim amshi Allende sorkar atsüngdoker taküm küm 50 ajunger.

CM Stalin-i India hockey team nem sen crore 1.1 agütsütsü nangzük



Luroi/August 13, 2023 (Agencies): India Hockey team-i Asian Champions Trophy akokba sülen Tamil Nadu Chief Minister MK Stalin-i senpet sen 1.1 crore agütsütsü nangzükogo.

India tebur Hockey team-i Honibarnü final asaya nung kanga meranga asayar Malaysia team goal 4-3 agi koka Mayor Radhakrishnan Hockey Stadium, Chennai nung Asian Champions Trophy pezübuba kokogo.

Stalin-i Twitter ajanga iba osang sagdong aser team nem tenüngsang agüja liasü.

Kasa mapang nung Hockey

India-ia, asayar aser support staff tem nem sempet agütsütsü sangdongogo.

Indian Men's Hockey Team nung züngsem ajak sen sempet sen lakh 3 agütsütsü aser Support Staff tem nem senpet sen lakh 1.50 agütsütsü, ta Hockey India tir Dr Dilip Turkey-i ashi.

"Taoba mapang hockey asayar ka ama iba takok ya ground nung takok anguba ka dang masü saka bendanga agüja inyakba aser teamwork kuli lir. Indian Men's Hockey Team-i Asian Champions Trophy Chennai 2023 akokba benjungba mapang Hockey

India-i asayartem nem senpet sen lakh asemsem aser Support staff tem nem senpet sen lakh 1.50 agütsütsü," ta tir-i ashi.

Final asaya ya tetenzüklenbo Malaysia-i amokbanger asaya liasü. Asaya nung mezüngbuba goal ya India atema Jugraj-i minute 9buba nung idaktsü. Iba sülen mapang tatsüka dang lir Malaysia nunger asayar Arzai-i goal ka idakja goal kasasa aküm.

Asaya tanabuba nung quarter nung Malaysia-i penalty corners pezü agiba nungi goal ana idakja parnok goal 3-1 agi tejakdang aküm. Goal tanabuba ya Razie Rahim-i minute 18buba nung idaktsü aser Aminudin Muhamad-i tasembuba goal idakja liasü.

Tasembuba quarter nung India-i goal küptoktsü atema kanga meranga asaya aser captain Harmanpreet Singh-i India atema tanabuba goal idakja liasü. Iba sülen Gurjant Singh-i India atema tasembuba goal idakja goal 3-3 aküm.

Tatembangbuba quarter nung Malaysia-i tasa melenshir asaya saka parnoki Akashdeep Singh menokdangteti minute 56buba nung pai India atema goal pezübuba idakja parnoki asaya akok.

Jaiswal-i T20I nung otsü tasen ka yangluogo



New Delhi, Luroi/August 13 (Agencies): India nunger lanur asayar Yashasvi Jaiswal-i West Indies den Honibarnü Lauderdale, Florida nung T20I pezübuba asayaba mapang kanga junga asayar Rohit Sharma-i otsü tasen yanglur aliba ajatetogo.

Arishi küm 21 tain Yashasvi, shibai out mesüi run 84 yanglua liasü pai India-i iba asaya wicket 9 agi akokba nung teyari tulu agüja tang tashi nung iba asayamung nung team anapronglai asaya anana koker lir. Rohit-i T20I asaya ka nung run 75 dak tema yanglur aliba ya küm 13 ser ita 3 aser anogo 6 tashi shingaia majateti aliba pai ajatetogo.

Mumbai nungi adokba cricket asayar ya India nunger asayartem rongnungi T20I nung run 75 dak tema yangluba asayartem rongnung tanobusang kümogo.

2010 küm Rohit-i Australia den Bridgetown nung asayaba mapang out mesüi run 97 yanglu aser iba mapang pa arishi küm 23 anogo 7 tain liasü. Yashasvi shibai four 11 aser six 3 züka liasü pa ya iba otsü tasen yangluba mapang arishi küm 21 anogo 227 tain liasü.

Iba asaya nung Yashasvi-i kanga junga asayaba sülen pa nem Match award agütsü. Pai ball 51 nung out mesüi run 84 yanglua liasü.

West Indies-i over 20 nung asayar 8 out ser run 178 yangluba sülen openers Yashasvi aser Shubman Gill nati tetenzük nungi kanga junga asaya aser Windies bowler tem nem timtem agüja liasü.

Yashasvi aser Shubman na senteper run 165 yanglu, koba India atema T20 asaya nung partnership timtiba rongnung tasembuba lir.

Taoba Chelsea Striker Diego Costa Botafogo nung denogo



Luroi/August 13, 2023 (Agencies): Brazil Serie A nung temaba jenjang nung aliba team Botafogo-i, Diego Costa free agent ka ama alizükba sangdong ka ajanga metetdaktüsüogo. Club nung asayartem aika yiruba ajanga tetsükdaktüsü adoker aliba mapang ka nung taoba Chelsea aser Atletico Madrid striker ya club-i anisemogo.

Taoba Porto striker Tiquinho Soares, shiba Brazilian league nung goal timtiba idaktsüba asayar lir pa ya April ita asayamung tenzükba sülen ita asem atonga player of the month liasü, pa Botafogo pur taoba hopta tatem Cruzeiro den asayaba mapang temekok yirua

Arishi küm 34 Costa ya June ita Premier League club Wolverhampton Wanderers toktsüba sülen free agent ka liasü aser pa Botafogo nungi ita pezü asayatsü atema tenangzüktepba yangluogo. Botafogo puri tang tashi nung asaya 18 nung asaya 14 koka point 12 agi parnok tanabuba jenjang nung aliba team dang nungi timba lir.

Kasa mapang nung Botafogo pur Copa Sudamericana asayamung tanabuba akoktsü atema merangba mapang ka lir aser parnok quarter-finals nung Argentina club Defensa y Justicia den asayatsü.

"Ni iba club nung adentsü atema shimtetba asoshi kanga pelar. Kanga pelar aser yakta ajuruptesü imla atati," ta Costa-i ashi.

"Botafogo-i maneni team tajung yanglutsü meranger aser Diego Costa den 2023 küm tatem tashi tenangzüktepba yangluba sülen pa tajangshiba dak metaloker asayatsü," ta club-i ashi.

"Diego anogo ishika tsüngda Rio de Janeiro-i arutsü aser coach Bruno Lage den longjemtsü, shiba kübok pa England nung Wolverhampton nung inyakogo," ta kasa sangdong ajanga metetdaktüsü.

2014 nungi 2017 tashi Chelsea nung asayaba mapang Costa-i goal 59 idaktsü aser London nung amendaker aliba club yagi Premier League title ana akokba nung teyari tulu agüja liasü.

Pa season asem asayaba mapang season asem prongla nung club nungi goal timtiba idaktsüba asayar liasü ajisüaka manager Antonio Conte den meputepi akümba sülen pa Spain nung Atletico Madrid-i meyipa ao.

Atletico nung mapang balala nung anaben asayaba mapang pai goal 83 idaktsü aser LaLiga titles ana aser Europa League koka liasü.

Al-Nassr-i Arab Cup akokba asaya nung Ronaldo yiru

Luroi/August 13, 2023 (Agencies): Arab Club Champions Cup 2023 final nung Al-Nassr-i Al-Hilal akokba asaya nung Cristiano Ronaldo yirur ground nungi anir tugua liasü.

Ronaldo, shibai goal ana idakja Al-Nassr-i Sergej Milinkovic-Savic-i aniba Al-Hilal team koka liasü pa mapang apuloktsür asayaba mapang yiru aser golf cart ka nung anir tugutsüsa aküm.

Portugal nunger nungtugu asayar ya temekok yiruba ajanga anir tuguatok.

"Team-i tang mezüngbuba tongtimbang asayamung ka akokba nung teyari agütsütetba atema kanga pelar," ta Cristiano-i pa indang social media account tem nung zülutsü.

Arishi küm 38 tain asayar ya online ajanga fan tem aikati nogitogo. Man United forward Alejandro Garnacho-ia Al Nassr-i Arab Cup akokba sülen Ronaldo dangi osang ka yoka liasü.

Asaya nungsa Cristiano Ronaldo-i otsü tasen ka yanglua asaya puti otsü nung Gerd Muller-i tekolak agi goal timtiba idaktsür aliba ajatetogo. Pai tang tashi nung tekolak agi goal 145 idaktsüogo, koba asür Gerd Muller dang nungi goal ka agi timba lir.

Ronaldo-i Saudi Arabian club Al Nassr nung adentsü telemtetba agiba ajanga aika süngmanga liasü.

Karibo pa tebilemba ashishiogo aser pa sen dak dang rangloker asayar ta shiogo. Karibo pa nem tenüngsang agütsüogo aser ashiba agi pa takok marok timba abentsü asoshi temlungtetba tulu lir.

Ronaldo-ia, pai takok ngunüba ajanga Al Nassr nung adener ta shiogo.

Pai ashiba agi, Al Nassr nükjidong tulu aliba angazüka pa kanga jangra aküm aser iba club ya alima nung football asaya nung club tashi tait ka akümstsü ta amangba lemsatetogo.

BILEMDANGANG

"Temlungtetba dang lira lenmangtem lapoker."